

In mat tranter dus babs

■ (anr/fa) Cun «Hendri e ses babs» po preschentar l'autur **Silvio Camenisch ses quart roman. Il cudesch è cumpari en la retscha litterara da la Romania «Nies Tschespet».** La retscha litterara Nies Tschespet da la Romania exista dapi 108 onns. «Ina da las finamiras essenzialas da noss'organisaziun è stada da l'entschatta ennà da promover la lectura da cudeschs rumantschs», ha declerà *Martin Cabalzar* mesemna saira a la ventgina da preschents ch'eran vegnids a tadlar la prelecziun da *Silvio Camenisch*. L'occurrenza ha gì lieu a Cuir en la Libreria Schuler. «En il temp dad internet e d'auters mediums èsi difficil da motivar la giuventetgna da leger er texts rumantschs», ha cuntinuà il president da la Romania. Ch'els sajan perquai cuntents d'avair auturs sco *Silvio Camenisch* che elavureschian litterarment temas actuals, giuvens, ha menziunà *Martin Cabalzar*. El ha infurmà che proxim'emna vegnia preschentà in ulteriur Tschespet: «I sa tracta d'in roman da viadi dad *Arno Camenisch*, damai d'in giuven autur che ha er il potenzial per interessar la generaziun giuvna.»

Situaziun reala ha dà l'impuls

«L'impuls per scriver quest roman m'ha dà atgnamain in da mes scholars», ha tradì *Silvio Camenisch*, «il mat abita cun sia



L'autur **Silvio Camenisch** ha prelegì or da ses pli nov roman.

FOTO F. ANDRY

mamma en la part sut dal vitg ed il bab en la part sura.» Ch'il figl veglia mantegnair il contact cun domadus geniturs, ha'l cuntinuà, ch'el rimnia tut las gasettas da la mamma per las manar cun il velo al bab, er sche quel haja abunà dapi daditg gia sez gasettas. «Quai è stà il mu-

ment inicial per mai per scriver quest roman.» Er il mat Hendri en ses raquint sa chatta en ina situaziun sumeglianta: Causa che sia mamma viva ensemen cun in auter partenari ha il mat en la vegliadetgna da la pubertad uss in bab da dumengias ed in bab da lavurdis. L'autur descriva co ch'il mat vegn a frida cun quests dus babs ch'èn fitg differents. Anc pli difficila daventa la situaziun cur che la mamma vegn a savair ch'ella ha cancer...

«Cun il scriver hai jau cumenzà en sa sez causa mia passiuin per la lectura», ha ditg l'autur, «durant il temp dal seminari scolastic a Cuir era jau vegnì confruntà cun blera litteratura, e quai m'ha fascinà fitg.» Uschia è naschì tar *Silvio Camenisch* gia baud il giavisch da scriver sez.

Il Tschespet 69 «Hendri e ses babs» da Silvio Camenisch pon ins cumprar en las librerias, tar la Lia rumantscha u tar il CCM a Laax. Il cudesch custa 25 francs.

Publitgà ses dieschavel cudesch

Silvio Camenisch è naschì 1953 cun il frar *schumellin Anton* a chasa a Rueun. Els èn ils vegls da la famiglia gronda da set uffants. Il bab era «commiss» da café e la mamma facheva la chasarina. Suentar las scolas dal vitg ha'l frequentà il seminari scolastic a Cuir. L'emprim onn ha'l dà scola a Siat. Dapi il 1976 instruescha'l a la scola primara da Domat. El viva là cun sia famiglia da trais uffants, entant creschids. En il temp liber scriva el gugent e savens. 1982 ha'l publitgà ils raquints «Miez miur e miez utschi», dus onns pli tard il ro-

man «Cara Laura». Las proximas publicaziuns èn dal 1986 «Smaledetta primavera, raquens» e dal 1989 «Metamorfofos», er raquints. La publicaziun dal 1990 sa numna «Tandem, historias in a l'auter» cun *Arnold Spe-scha*. L'onn suenter ha scrit *Silvio Camenisch* «Da mesa stad», quai èn istorgias criminalas. 1994 ha'l publitgà «Gregory Greg», ses emprim roman da giuventetgna e 1995 in roman che sa numna «L'auter». L'ultima publicaziun da *Silvio Camenisch* avant l'actuala era «Frenzi, raquens» (2001).